

REGIONAL NEWS BULLETIN

HEADLINES (EVENING)

1. Mission XI Million programme vawiin khan Aizawl Sipai Lammual-ah neih a ni a. Union Minister of State, Youth Affairs and Sports changtu Vijay Goel-a'n a hmanpui.
2. Khawvel pum huapa ruihhlo hmansual leh tawlhruk dona ni pualin vawiin khan Aizawl Vanapa Hall-ah hun hman a ni.
3. India leh United States-te chuan Pakistan chu a ramchhunga firfiakten tanhmun an siam thin ti tawp turin an ngen.
4. Prime Minister Narendra Modi chuan ram pathum a tlawh tur zinga a hnunung ber atan vawiin khan Netherland khawpui Amsterdam a thleng.

<><><>

MISSION XI MILLION:

Mission XI Million programme chu vawiin khan Aizawl Sipai Lammual-ah neih a ni a. Union Minister of State, Youth Affairs and Sports changtu Vijay Goel-a'n a hmanpui.

Pu Vijay Goel-a chuan Mission XI Million programme chu India ram puma school 15,000-a zirlai naupang maktaduai 11-ten football-a hma an sawn theihna tur ruahmanna a nih thu leh hmalakna tur zaa 15 vel chu an tuam chhuah tawh thu a sawi a. Prime Minister Narendra Modi-a'n infiamna hrang hrang hmasawna turin theihtawp a chhuah a, ram chung kiltina zirlai naupangte chu an tuina zawng tak infiamnaah an thiamna tihpun a nih theih nan hma a la a ni, a ti.

Education Minister Pu H.Rohluna pawhin thu sawiin, Mission XI Million Programme kalpuina tur ram chung khawpui thlanchhuah zinga Aizawl a tel ve chu a lawmawm a, infiamna kawng hrang hranga \halaiten hma an sawn theih nan state sawrkar chuan theihtawp a chhuah a ni, a ti.

Mission XI Million Programme hi sawrkar laipuiin kumin February ni 10 khan a tlangzarh a; October thlaa FIFA Under-17 Football World Cup 2017 India-in a thlen dawn avangin he programme hi sorkar laipui chuan inbuatsaih nan a hmang a. Ram mipuite zinga football tihlar nan leh zirlai naupangte talent tihpun a nih theihna tur hmanraw \angkai a nih beiseiin seminar, workshop, football-a inelna leh programme hrang hrang India ram khaw 31-ah a buatsaih a, heng khawpui thlan chhuah zingah hian Aizawl pawh a tel a ni. Mission XI Million programme hnuaiah hian Aizawl khawpui chhunga school 189 register an ni tawh a, he programme enkawltu Mizoram State Coordinator Pu Francis Paul hnenah registration hi tih chhonzawm zel theih a ni.

Vawiin Mission XI Million programme-ah hian Education Minister Pu H.Rohluna, Sports Minister Pu Zodintluanga, Parl Secy Pu Hmingdailova Khiangte, rampum huapa football khel thiam lar Jeje Lalpekhlua, Robert Lalthlamuana leh S.Malsawmtluanga te bakah Mizoram Football Association hruaitute, sawrkar official-te leh Mission XI Million programme hnuaia in-register tawh school engemawzat an tel a ni.

(IPR)

<><><>

UNION MOS

Union Minister of State for Sports & Youth Affairs Vijay Goel-a'n Mizoten infiamna an ngainat avangin infiamna lama hma an sawn zel theih nan ngaih pawimawh an ni ang, a ti.

Vawiina Aijal Club-a NYKS, NCC, NSS leh Sports Association hrang hrangte a kawmnaah he thu hi sawiin Pu Goel-a chuan, tunhnaia football-a Mizoram hlawhtlinnate chuan Mizote'n hmasawn tura theihna an neih san zia a lantir a, Mizo infiammite zingah thiam bik an awm anih chuan tumah hlamchhiah an ni dawn lova, an phu ang ngei zirtirna \ha an dawn theih nan sorkarin hma a la zel dawn a ni, a ti.

Ram pum huapa infiammi talent nei \hate haichhuak turin Sports Authority of India (SAI) enkawlina hnuaiah Sports Talent Search Portal hawn thuai tum a ni a, he portal-ah hian infiammite'n an chanchin leh an video-te pho chhuakin SAI-in kal zel tlak a ngaihte chu training \ha tak a pe \hin dawn a ni, a ti.

Union MoS hian Olympics 2020, 2024 leh 2028 inpuahchahna atan Scholarship Cheng nuai 5 \heuh, thalai 1,000 hnenah kum 8 chhung pek a nih tur thu te, Manipur-ah National Sports University din a nih tur thu te, infiamna hmanga mi tam zawk eizawna siamsak tura hmalak dan tur duan a nih thu leh he ruahmanna zir chiang tura ruat Task Force pawhin an report sorkar hnena an thehluh tawh thu te a sawi a ni.

Vawiin inkawmhona hi Parl Secy. Pu Hmingdailova Khiasngte-in a kaihruai a, Sports Minister Pu Zodintluanga'n Union Minister hi a \awiwam a, Sports Assn. hrang hrangte'n an hmalaknate leh harsatna an tawhte Union Minister hi an hrilh a ni. (Corr)

<><><>

UNION MOS MEETS GOV & CM:

Zan khat riaka rawn zin Union Minister of State for Youth Affairs & Sports Vijay Goel-a hian nimin tlai leh nizan khan Governor Lt. Gen Nirbhay Sharma-a leh Chief Minister Pu Lal Thanhawla te an chenna in ve veah a kawm.

Governor nena an inkawmna Raj Bhavan-ah Union Minister hi Mizoram Mizoram dinhmun leh mamawhte Governor hian hrilhin theihtawp chhuahpui turin a ngen a.

Union Minister chuan Mizoram-in Infiamna lama hmasawna duhawm tak a chang chu a lawmpui thu a sawi a. Prime Minister-in infiamna tihmasawn a tum thu leh hemi atan hian budget pawh tihpun a nih thu Governor hi a hrilh a. Infiamna tihmasawn zel tur chuan thingtlang a\anga \anin theihna leh thiamna neite zawchhuah zel an ni ang, a ti a. Mizoram chu nuam a tih thu sawiin, inthlanna felfai taka neih a ni te, faina, khawtlang nuna Tlawmngaihna leh YMA te hnathawhte chu a fakawmin, ram pum tan entawna hman nise a duhawm hle a ni, a ti.

Nimin tlai khan Union Minister hian Chief Minister Pu Lal Thanhawla chu a chenna, CM Bangla-ah a kawm bawk a. Chief Minister hian Mizoram hmasawna hrang hrang, a bikin infiamna lama tunhnaia Mizoram hlawhtlinna te lo hrilhin infiamnain hma a sawn zel theih nana theihtawp chhuahpui turin a lo ngen a ni.

Union Minister hian Mizoramin football-a hlawhtlinna a hmuh te chu lawmpuiin football leh infiamna danga hmasawn zel theih nan a theih ang anga Mizoram \anpui a duh thu a sawi a ni.

Nimin chawhnu khan Cricket Association of Mizoram President Chief Minister Pu Lal Thanhawla hian Union Minister

Pu Vijay Goel-a hi Sihmuia Suaka Cricket Ground a tlawhpui a, thil \ul te leh cricket hmasawn dan tur a hmunah an sawiho a ni.
(IPR)

<><><>

LADC BUDGET SESSION:

Lai Autonomous District Council (LADC) rorelna mumal loh vanga hun engemaw chen Budget Session neih a nih tawh loh hnuah vawiin khan ni 3 chhung aw h tur, LADC Emergency Budget Session 2017 chu \an a ni a. Chairman Pu V Zirsanga'n a kaihruai.

Vawiin session-ah hian Chief Executive Member, Pu T. Zakunga'n budget a pharh a. Kum 2017-18 atana LADC budget ruahman hi a vaiin Cheng Vbch 133 Nuai 59 leh Sing 4 a ni a, Non-plan-ah Cheng Vbch 97 Nuai 72 Sing 5 Sang 5; Grants-in-aid, LADC Plan ah Cheng Vbch 32 Nuai 44 Sing 3 Sang 5; V/C Renumeration (Mizoram Finance Commission) Grants-ah Cheng Nuai 182 leh Sing 5; Local Revenue Collection-ah Cheng Nuai 160 dah a ni.

Non-Plan tia hriat thin, 02-GFSC Award hnuai-ah hian Sorkar hnathawkte hlawh atan Cheng Vbch 97 Nuai 2 Sing 5 Sang 5 dah a ni a, Non-Salary-ah Cheng Nuai 70 dah a ni baw k a. V/C (MFC Award)-ah Cheng Nuai 182 leh Sing 5, Local Revenue Collection-ah Cheng Nuai 160 te dah a ni a, a vaiin Plan hnuai-ah hian Cheng Vbch 101 Nuai 15 leh Sang 5 dah a ni.

Non-Plan (01-G.I.A to LADC) hnuai-ah hian Sorkar hnathaw k hlawh atan Cheng Vbch 24 Nuai 59 Sing 3 Sang 5 leh Non-Salary ah Cheng Nuai 785 dah a ni a, Non-Plan-ah hian a vaiin Cheng Vbch 32 Nuai 44 Sing 3 Sang 5 dah a ni.

LADC Budget Session hi naktuk dar 10:30-ah chhunzawm a ni ang a, naktukah chuan vawiina pharh tak Budget sawiho a ni ang a, naktip Zirtawpni chawhma lamah budget hi pawm a nih dawn leh dwan loh buk a ni ang a, chawhnu lamah Deputy Chairman thlan a ni ang.

(LawngtlaiPTC)

<><><>

INTNL DAY OF ILLICIT DRUG TRAFIKING:

Khawvel pum huapa ruihhlo hmansual leh tawlhruk dona ni pualin vawiin khan Aizawl Vanapa Hall-ah hun hman a ni.

'International Day against Drug Abuse & Illicit Trafficking' hi nimin ni mah se sorkar office chawlh ni a nih vangin sorkar Department hrang hrang leh tlawmngai pawlte \angho buatsaihin vawiinah hman a ni a. Social Welfare Minister Pu P.C. Lalthanliana, Health & Family Welfare Minister Pu Lal Thanzara leh Parliamentary Secretary Pu K. Lalrinthanga ten an hmanpui a. Kumin atan he ni puala thupui thlan chu "Ngaithla phawt rawh" tih a ni a. Hei hi him tak leh hrisel taka \halai leh naupangte an \han theih nan an sawi tur neihte ngaihthlaksak nachang hre \hin tura inchahna a ni.

Minister Pu Lal Thanzara chuan Mizoramah ruihtheih thilin a tihbuai ve miah loh chhungkua an awm tak mang loh avangin ruihhlo hmansual laka inven leh ruihhlo vanga harsatna taw k mekte mumal tak leh kawngmang nei taka enkawl a \ul a ni, a ti a. Mizoram mipui mi Nuai 11 vel awrh awm zingah ruihhlo ti \hin mi 25,000 vel awmin, chung zinga mi 10,000 chuang chu inchiu \hin an nih thu te, Mizorama ruihhlo ngaite enkawl na hmun hrang 30-ah englai pawha enkawl lai mi 2,000 baw r vel awm awm reng thu

te sawiin Health Minister chuan, sorkar, kohhran leh NGO pawl hrang hrangten an tha thlah lova \an an lak deuh deuh a duh thu a sawi a ni.

Social Welfare Minister Pu P.C. Lalthanliana pawhin thu sawiin, khawvel pum huap ruihhlo hmansual leh tawlhruk dona ni chu Mizoramah hman ve ngai lo se tih chu duhthusam ni mah se hman ngai leh \ul ber ram a la ni chu thil lungngaihthlak tak a ni, a ti a. Hemi kawngah hian a kaihnawih sorkar department, tlawmngai pawl te leh kohhran te bakah mipui zawng zawng \anrual a pawimawh takzet a ni, a ti.

Vawiin 'International Day against Drug Abuse & Illicit Trafficking' programme hi Social Welfare Department, Health Department, DC Aizawl, Excise & Narcotics, Mizoram Police, IG Prisons, School Education, MSACS, MRHG leh SCERT-te bakah State Child Protection Society, MDUF, FINGODAP, Life Code leh MSD&RB te \anghovin an buatsaih a ni a. Sorkar department hrang hrang hotute leh tlawmngai pawl leh kohhran aiawhte bakah zirlai naupangte an tel a ni.

(CORR)

<><><>

INDIA, US CALL ON PAKISTAN TO STOP ITS SOIL FROM BEING USED AS TERROR LAUNCH PADS

India leh United States-te chuan Pakistan chu a ramchhunga firfiakte tanhmun siam thin ti tawp turin an ngen. Hei bakah hian Mumai 26/11 leh Pathankot inbeihnaa mawhphurtu hrem an nih theih nana hma la turin an ngen bawk.

US tlawha a cham chungin PM Narendra Modi chuan President Donald Trump hmuin firfiaka chetna do tur leh firfiakte inkhuarna hmun tih bo anih theih nan chak zawka hmalak an tiam a.

(*Newsnair*)

<><><>

PM MODI ARRIVES IN AMSTERDAM, CAPITAL OF NETHERLANDS ON FINAL LEG OF HIS 3-NATION TOUR

Prime Minister Narendra Modi chuan ram pathum a tlawh tur zinga a hnukung ber atan vawiin khan Netherland khawpui Amsterdam a thleng. PM Modi hian Netherland-a a cham chung hian Dutch PM Mark Rutte nen an inkawm ang a, khawvel mamawh thil hrang hrang an sawi dawn a. Heng zingah hian firfiaka chetna dona tur leh sik leh sa inthlak venna tur chungchangte a tel ang.

PU Modi hian Dutch company liana CEO-te a kawm dawn bawk a, Netherland lal King Willem-Alexander leh Queen Maxima-te a hmu bawk ang.

Netherland-a India mi chengte hmaah PM hian thu a sawi dawn bawk a, kumin hi India leh Netherland sawrkarte hian an thawhdunna kum 70 tlin champha a hmang mek a ni.

(*Newsnair*)

<><><>